

Marianna Brandt en Tanja Joubert laat die sterte swaai

RONÉL MCKNIGHT

Bibliotekaris, Piketberg

Met Biblioteekweek se tema *Ons sterre sé lees!* het ons besluit om van ons skrywersterre te nader om groot en klein te kom motiveer om te lees. Die kinderboekskrywer, Marianna Brandt en illustreerder, Tanja Joubert, het hierdie praatjie met groot entoesiasme kom aanbied. Gewapen met 'n hokkie vol verskillende sterte en interessante staaltjies oor die Stoutsterre en Magrietjie Swaiboude, het hulle groot en klein aan hulle lippe laat hang!

Ook vir die leeskring was dit 'n belewenis om te hoor hoe kinderboekskrywers en illustreerders te werk gaan om lekker, genotvolle boeke vir kinders te skep. Ons was verstom oor hoeveel navorsing elke boek voorafgaan. Voorwaar geen kinderspeletjies nie!

Of ons sterre kinders en grootmense gemotiveer het om te lees? Geoordeel na die stormloop en lang waglys vir die Stoutsterre en Magrietjie Swaiboude, definitief! (Van die kindertjies het so bietjie met die name gesukkel en kom vra vir die Stoutstertel!)

Oor die skrywer, Marianna Brandt

Marianna het grootgeword in Namibië waar Afrikaanse storieboeke maar skaars was. Haar ma het hulle egter letterlik stories saam met hul pap gevoer. Marianna glo dat al die stories wat haar ma vir hulle gelees het, haar gehelp het om kreatief te dink. Op twaalfjarige ouderdom het sy haar eerste verhaal geskryf en op band opgeneem, met byklanke. Die bure se seuns is genooi en hulle eie radioverhaal is gemaak!

Marianna het na skool as mediese tegnoloog gekwalifiseer en vir tien jaar in 'n laboratorium gewerk. Ná 'n oorsese reis het sy egter besluit dat dié vier mure haar nie weer gaan sien nie.

Haar besluit om by die SAUK te gaan werk, het indirek 'n ontlukende skryftalent laat bloei. Sy het onder meer 50 stories vir die kinderprogram, *Siembamba*, geskryf. In 1985 word haar eerste boek gepubliseer, naamlik, *Poppie Dot van die Kaap*. Na die kinderstories het



draaiboeke vir televisie sowel as navorsing en vervaardiging van programme vir die televisie-reeks *Uit en Tuis* gevolg.

Haar skrywersloopbaan het egter eers regtig posgevat met die verskyning van 'n reeks

Aids-sterreboeke in 1992.

In 1998 was Marianna een van vyf skrywers uit Suid-Afrika wat genooi is vir 'n program, die Shuttle 99 Project in Ysland. Tydens hierdie geleentheid moes hulle 'n kinderboek produseer wat later deur 'n Yslandse uitgewer uitgegee is. Marianna se boek was *Kria the summerbird*. Nog later het die *Rimpelstories* verskyn, gevolg deur *Die stoutsterre - van Texel tot Tafelbaai*; *Die stoutsterre - poot aan wal*; *Markus Stermuis op die Sojoes 3...2...1!* en *Die avonture van Magrietjie Swaiboude*.

Skryf is vir Marianna 'n proses van verkenning en inleef. 'n Storie word nie oornag uitgedink nie en jy moet passievol in die lewens van jou karakters inklm. Jy moet jou karakters dus baie goed ken.

Hoewel sy ook ander stories skryf, lê kinderboeke haar na aan die hart.

Sy dink dierekarakters vind veral byval by kinders omdat jy nie polities korrek hoef te wees nie. Muis is muis en honde is honde.

Marianna se boeke is al in verskeie tale vertaal en word gelees in Gambië, Ghana, Namibië, Kenia, Ysland, Swaziland en Suid-Afrika.

Haar boeke word net soveel deur grootmense as kinders geniet. Verroeste geskiedenis-kennis kan ook lekker opgeknip word!

Sy werk tans vir nege uitgewers. Haar werk wissel van opvoedkundige leesstof en teksboeke tot stories, radio-dramas en stories

vir die kommersiële mark. Haar hoofdoel is om boeke te skryf waarmee kinders hulleself kan identifiseer. Stories moet kinders bemagtig. Hulle leer deur stories, hulle leer hoe om moeilike situasies te hanteer (soos dood en rampe) deur die ervarings van die boekkaraktertjies. Kinders leer ook hoe om planne te maak en hoe om uit moeilike situasies te kom.

Marianna se droom is om eendag 'n animasieteks vir een van haar stories te skryf.

Marianna se boeke

Poppie-Dot van die Kaap is haar eerste kinderboek wat in 1985 verskyn het en is in 1993 opgevolg met **Poppie-Dot by die Grootrivier**.

Die mieliestronkpop verskyn in 1998. In 2000 is dié boek met die ATKV Kinderboektoekening bekroon. Die Engelse vertaling kry in 2001 in Italië die White Raven-nominasie.

Die geheim van die toringkamer verskyn in 2001 as deel van 'n avontuurreeks van Human & Rousseau en is 'n ligte spanningsverhaal vir die jeug.

Die Stoutsterre - van Texel tot Tafelbaai het verskyn na aanleiding van die 350ste bestaansjaar van die Kaap in 2002. Marianna wou die verhaal van Jan van Riebeeck aan kinders vertel - en só beland die muis saam met Jan van Riebeeck op die skip en al die feite kom daarmee saam.

Op die skip beleef hulle baie avonture saam met die res van die bemanning. Volgens opgetekende bronne was daar wel muis aan boord van die skip wat saam met Jan van Riebeeck aan die Kaap aangekom het.

Vir haar navorsing het sy joernale en Jan van Riebeeck se dagboek geraadpleeg. Behalwe vir



Marianna se muise wat kan praat, is die res van die gebeure op die skip dus boekstaaf!

Aan die Kaap aangekom moes die muise blyplek kry, want daar was nog nie huise toe Jan van Riebeeck geland het nie. Hulle het dus met 'n effense probleem gesit. Op hierdie manier ontmoet hulle die streepmuise van die Kaap wat in die veld bly en allerhande gruwelike goed eet! Die tweede Stoutstertboek, **Die Stoutsterte - poot aan wal** handel oor die Stoutsterte se wedervaringe aan die Kaap.

Markus Stermuis en die Sojoes 3...2...1! is gebaseer op Mark Shuttleworth se ruimtereis na die Internasionale Ruimtestasie saam met 'n Rus en 'n Italianer en verskyn in 2003. Marianna wou kinders hierdie avontuur laat beleef deur 'n muise saam met Mark die reis te laat meemaak. In Sterstad aangekom ontmoet Markus 'n Italiaanse en 'n Russiese muise wat die reis saam met hom wil meemaak. Die drie muise gaan dan ook deur dieselfde voorbereidingsprogram as die drie ruimtevaarders en saam met Pommelina die tosselpop, Bephu die beertjie en Froggel die padda vertrek hulle na die Internasionale Ruimtestasie.

Marianna en Tanja het ook vir hierdie boek deeglik navorsing gedoen voordat hulle begin het. Marianna se navorsing het haar, onder andere, gelei na Mark Shuttleworth se ouers (toe mev Shuttleworth opmerk dat hulle muise in hulle tuin het, het Marianna dadelik haar karakter gehad wat saam sou reis!). Die res van haar navorsing het sy gedoen by die Ruimte-Instituut self. Weereens ervaar Markus Grysmuis, Joerie Muisenof en Viktori Kaasetti dieselfde opwindende as Mark Shuttleworth en sy mede-reisigers, op 'n lewensgetroue wyse!

Die avonture van Magrietjie Swaiboude is geïnspireer deur die verhaal van Phillip Kotzé, 'n hempleeg van George en sy Labrador-hond, Magrietjie. Samuel, 'n kokketiel, en ook deel van Phillip se huishouding, vorm deel van die storie. Dié driemanskap toer George se strate met 'n omgeboude fiets waarop besighede hulle dienste adverteer. Middagetes word by verskillende restaurante geborg en Sondae by die ouetehuis.

Magrietjie se gunsteling-eetplek het pasteie verkoop. Omdat Magrietjie bietjie oorgewig was, het Phillip haar verbied om vir pasteie te gaan vra, wat toe maar in elk geval skelm (en omkyk-omkyk!) agter die toonbank gaan bedel is! Magrietjie en Samuel het Phillip oral vergesel. Samuel is later die flik belet omdat hy te veel geraas het, maar met 'n doek oor die koutjie het Phillip daarin geslaag om Samuel stil te kry!

Magrietjie was baie gewild en het selfs as blommemeisie by 'n troue opgetree. Kerk toe gaan was dus geen aardigheid nie. Magrietjie van die boek is ongelukkig 'n jaar

gelede deur 'n lorie doodgery (sy was darem al bejaard!) en Phillip het 'n nuwe Labrador gekry, Magriet. 'n Regte tiener en vol nukke, maar Phillip is vol moed dat sy ook nog slim sal word.

Marianna en Tanja het 'n tyd lank op George gaan bly om al Magrietjie en Phillip se bedrywighede dop te hou en só het **Die avonture van Magrietjie Swaiboude** die lig gesien.

Dit is dus soms 'n foto, 'n artikel of net iets wat gebeur, wat as inspirasie dien vir 'n storie.

Marianna het so pas 'n volgende boek voltooi wat teen Maart 2008 op die rakke sal wees. Dit belooft om deur kinders sowel as grootmense geniet te word. Ons sien baie uit daarna!

Meer oor Tanja Joubert

Tanja Joubert wat die illustrasies vir Marianna se boeke doen, het aan die Hoërskool Tygerberg gematrikuleer en grafiese kuns studeer. Behalwe Marianna se vier boeke (sy is besig met die vyfde!) het sy so pas ook die nuwe **Haas Das** geïllustreer. Voorheen het sy hoofsaaklik illustrasies vir akademiese materiaal gedoen.

Voordat Tanja begin illustreer doen sy baie navorsing - somtyds maande lank. Die kos en kleredrag vir die Stoutsterte, byvoorbeeld, is eers deeglik nagevors voordat sy begin teken het. Die historikus, Dan Sleight, se hulp is ingeroep wanneer sy vasgedraai het.

Tanja doen ongelooflik baie moeite wanneer sy nie antwoorde op haar vrae kry nie. Toe sy nêrens kon uitvind hoe die brode in 1652 gelyk het nie, het sy gaan navors hoe die broodpanne gelyk het, en haar illustrasies daarby aangepas.

Om haar illustrasies lewensgetrou te maak, het Tanja vir haar 'n muisstert laat maak en daarmee rondbeweeg. Só kon sy presies sien wat met 'n muise se stert gebeur wanneer hy beweeg!

Vir die illustrasies van **Magrietjie Swaiboude** het sy soos 'n hond op die grond rondbeweeg, en besef dat 'n hond, byvoorbeeld, altyd opkyk!

Noue samewerking tussen skrywer en illustreerder is uiters belangrik. Tanja se illustrasies weerspieël soms aksies wat nie noodwendig deur Marianna in die storie weergegee is nie. Die twee vul mekaar dus aan.

Na dese sal ek beslis met ander oë na kinderboek-illustrasies kyk. Gewone prentjies is dit nie sommer nie - wel deeglike navorsing en baie harde werk!

Wat Marianna en Tanja se werk soveel meer merkwaardig maak, is die feit dat dit nie net vir hulle 'n werk is waarvoor hulle betaling ontvang nie, dit is 'n passie om ook op te voed en kennis aan die lesertjies oor te dra. Tussen die skryfery en illustreerder maak hierdie twee ook nog tyd om lees en boeke by skole en boekwinkels te gaan bemark.

Twee talentvolle mense wat sowaar woeker met hulle talente tot voordeel van ons kinders!

Voorbeelde van illustrasies deur Tanja Joubert



Links: **Die Stoutsterte - van Texel tot Tafelbaai**

Onder: **Die avonture van Magrietjie Swaiboude**



Bo: **Markus Stermuis en die Sojoes 3...2...1!**